

摘藻堂四庫全書薈要

集部

欽定四庫全書會要

集部

御定全唐詩卷十八

五十五

詳校官候補通政經歷臣郭祚職



欽定四庫全書薈要卷一萬七千四百二十

集部

御定全唐詩卷十五

郊廟歌辭

讓皇帝廟樂章

吏部侍郎
李舒撰

迎神

皇矣天宗德先王季因心則友克讓以位爰命有司式
遵前志神其降靈昭饗祀事

奠幣

惟帝時若去而上仙祀用商舞樂備宮懸白璧加薦玄纁告虔子孫拜後承茲吉蠲

迎俎

祀盛體薦禮協粢盛方周假廟用魯純牲捧徹祇敬擊拊和鳴受釐歸胙既戒而平

酌獻

八音具舉三壽既盟潔茲宗彝瑟彼圭瓚蘭肴重錯椒醑飄散降胙維城永為藩翰

亞獻終獻

秩禮有序和音既同九儀不忒三揖將終孝感藩后相維辟公四時之典永永無窮

送神

奠獻已事昏昕載分風搖雨散靈衛綢繆龍駕帝服上騰五雲泮宮復闕寂寞無聞

享隱太子廟樂章

唐書樂志曰貞觀中享隱太子廟樂迎神用誠和登歌奠

玉帛用肅和迎俎用雍和送文舞出迎武舞入用舒和武舞用凱安送神用誠和詞同迎神

誠和

道閔鶴關運經鳩里門集大命俾歆嘉祀禮亞六瑚誠
殫二簋有誠顯若神斯戾止

肅和

歲肇春宗乾開震長瑤山既寂戾園斯享玉肅其事物
昭其象弦誦成風笙歌合響

雍和

明典肅陳神居邃啟春伯聯事秋官相禮有來雍雍登

歌濟濟緬維主鬯庶歆芳醴

舒和

三縣已判歌鐘列六佾將開羽鉞分尚想燕飛來蔽日
終疑鶴影降凌雲

凱安

天步昔將開商郊初欲踐撫戎金陣廓貳極瑤圖闡難
戟遂崇儀龍樓期好善弄兵隳震業啟聖隆嗣典

隱太子廟樂章

唐書樂志曰太樂舊有隱太子廟迎送神辭二章不詳所起

迎神

蒼震有位黃離蔽明江充禍結戾據災成銜冤昔痛贈
典今榮享靈有秩奉樂以迎

送神

皇情悼往祀議增設鐘鼓鏗鏘羽旄昭晰掌禮云備司
筵告徹樂以送神靈其鑒閔

享章懷太子廟樂章

唐書樂志曰神龍初享章懷太子廟樂章第一迎神

第二登歌酌也第三迎組及酌獻第四送大舞
出迎武舞入第五武舞作第六送神詞同隨廟

迎神

副君昭象道應黃離銅樓備德玉裕成規仙氣靄靄靈
從師師前驅戾止控鶴來儀

登歌酌鬯

忠孝本著羽翼先成寢門昭德馳道為程幣帛有典容
衛無聲司存既肅廟享惟清

迎俎酌獻

通三錫胤明兩承英太山比赫伊水聞笙宗祧是寄禮

樂其亨嘉辰薦俎以發聲明

送文舞迎武舞

羽籥崇文禮以畢干鉞奮武事將行用舍繇來其有致
壯志宣威樂太平

武舞作

綠林熾炎歷黃虞格有苗沙塵驚塞外帷幄命嫖姚七
德干戈止三邊雲霧消寶祚長無極歌舞盛今朝

享懿德太子廟樂章

唐書樂志曰神龍初享懿德太子廟樂章第一迎神

第二登歌酌卺第三迎俎及酌獻第四送文舞
出迎武舞入第五武舞作第六送神詞同隱廟

迎神

甲觀昭祥畫堂升位禮絕羣后望尊儲貳啟誦慙德莊
丕掩粹伊浦鳳翔緱峰鶴至

登歌酌卺

譽闡元儲寄崇明兩玉裕雖晦銅樓可想弦誦輟音笙
歌罷響幣帛言設禮容無爽

迎俎酌獻

雍雍盛典肅肅靈祠賓天有聖對日無期飄飄羽服掣
曳雲旗眷言主鬯心乎愴茲

送文舞迎武舞

八音協奏陳金石六佾分行整禮容滄溟赴海還稱少
素月開輪即是重

武舞作

隋季昔云終唐年初啟聖纂戎將禁暴宗儒更敷政威
略靜三邊仁恩覃萬姓

享節愍太子廟樂章

唐書樂志曰景雲中享節愍太子廟樂章第一迎神

第二登歌酌名第三迎俎及酌獻第四送文舞出迎武舞入第五武舞作第六送神詞同應廟

迎神

儲后望崇元良寄切寢門是仰馳道不絕仙袂雲會靈
旗電晰煌煌而來禮物攸設

登歌酌鬯

灼灼重明仰承元首既賢且哲惟孝與友惟孝雖遙靈

規不朽禮

一作祀

因誠致備絜玄酒

迎俎酌獻

嘉薦有典至誠莫騫畫梁雲亘雕俎星連樂器周列禮
容備宣依稀如在若未賓天

送文舞出迎武舞入

邕邕闡化憑文德赫赫宣威藉武功既執羽旄先拂吹
還持玉鉞更揮空

武舞作

武德諒雍雍由來掃寇戎劒光揮作電旗影列成虹霧

廊三邊靜波澄四海同睿圖今已盛相共舞皇風

享文敬太子廟樂章

請神

許孟容作

觴牢具品管磬有節祝道寅恭神儀昭晰桐圭早貴象
輅追設聲達樂成降歆豐潔

登歌

陳京作

歌以德發聲以樂貴樂善名存追仙禮異鸞旌拱脩鳳
鳴合吹神聽皇慈仲月皆至

迎俎酌獻

馮伉作

撰日瞻景誠陳樂張禮容秩秩羽舞煌煌肅將滌濯祇
薦芬芳永錫繁祉思深饗嘗

送文舞送武舞

不詳作者

千旄羽籥相虧蔽一進一退殊行綴昔獻三雍盛禮容
今陳六佾崇儀制

亞獻終獻

崔郊作

禮齊泛尊彝軒縣動干戚入室僊如在升階虔所歷奮

疾合威容定利舒
皦繹方崇廟貌禮
永被君恩錫

送神

張薦作

三獻具舉九旗將
旋追勞表德罷享
賓天風引仙管堂
虛畫筵芳馨常在
瞻望悠然

享惠昭太子廟樂章

請神

歸登作

嘉薦既陳祀事孔
明閒歌在堂萬舞
在庭外則畫物內
則畫誠鳳笙如聞
歌其潔精

登歌

杜羔作

因心克孝位震遺芬賓天道茂軫懷氣分發祇乃祀咳
歎如聞二歌斯升以詠德薰

迎俎酌獻

李逢吉作

既潔酒醴聿陳熟腥肅將震念昭格儲靈展矣禮典薰
然德馨愔愔管磬亦具是聽

送文舞出迎武舞入

孟簡作

喧喧金石容既缺肅肅羽駕就行列緌山遺響昔所聞

廟庭進旅今攸設

亞獻終獻

卷度作

重輪始發祥
齒胄方興學
冥然升紫府
鏗爾薦清樂
奠
聳致馨香
在庭紛羽籥
禮成神既醉
髣髴緱山鶴

送神

王涯作

威儀畢陳
備樂將闋
苞茅酒縮
管蕭香徹
宮臣展事
肅
雍在列
迎精送往
厥鑒昭晰

武后崇先廟樂章

載本集

先德謙撝冠昔嚴規節素超今奉國忠誠每竭承家至
孝純深追崇懼乖尊意顯號恐玷徽音既迫王公屢請
方乃俯遂羣心有限無由展敬奠醑每闕親斟大禮虔
申典冊蘋藻敬薦翹襟

褒德廟樂章

唐書樂志曰神龍中中宗為皇后
韋氏祖考立廟曰褒德其廟樂迎

神用昭德登歌用進德祖入初獻用褒德
次武舞作亞獻及送神用彰德詞並內出

昭德

道赫梧宮悲盈蒿里爰賜徽烈載敷嘉祀享洽四時規

陳二簋靈應昭格神其戾止

進德

塗山懿戚媯汭崇姻祠筵肇啟祭典方申禮以備物樂
以感神用隆敷叙載穆彝倫

褒德

家著累仁門昭積善瑤篚既列金縣式展

武舞作

昭昭竹殿開奕奕蘭宮啟懿範隆丹掖殊榮闢朱戟六

佾薦徽容三簋陳芳醴萬石覃貽厥分珪崇祖禩

彰德

名隆五嶽秩映三台嚴祠已備睟影方迴

舞曲歌辭

功成慶善樂舞詞

一曰九功舞殿庭朝會所奏文舞也新唐禮樂志曰

太宗生於武功之慶善宮貞觀六年幸之宴從臣賞賜閭里同漢沛宛帝歡甚賦詩呂才放之管絃名曰功成慶善樂以童兒六十四人冠進德冠紫紵衫長襖漆髹屐履而舞舊書樂志曰慶善樂太宗所造也名九功之舞舞始安徐以象文德洽而天下安樂也冬正

享識及國有大慶與
七總舞結奏于庭

壽丘惟舊跡
鄴邑乃前基
粵余承累聖
懸弧亦在茲
弱齡逢運改
提劍鬱匡時
指麾八荒定
懷柔萬國夷
梯山盛入款
駕海亦來思
單于陪武帳
日逐衛文槐
端宸朝四岳
無為任百司
霜節明秋景
輕冰結水湄
芸黃遍原隰
禾穎積京坻
共樂還譙宴
歡此大風詩

中和樂舞詞

唐會要曰貞元十四年德宗以中和節自製中和舞舞中成八卦又

叙其舞曰朕以中春之首紀為令節象中和之容作中和之舞按此曲蓋因繼天誕聖樂而作

也

芳歲肇佳節物華當仲春乾坤既昭泰煙景含氤氲德
淺荷玄貺樂成思治人前庭列鐘鼓廣殿延羣臣八卦
隨舞意五音轉曲新顧非咸池奏庶協南風薰式宴禮
所重浹歡情必均同和諒在茲萬國希可親

凱樂歌辭

唐書樂志曰唐制凡命將出征有大功獻俘馘其凱樂用鈞吹二部樂器

有笛箏篳篥蕭笳鈞歌鼓七種迭奏破陣樂等四曲一破陣樂二應聖期三賀聖歡四君臣同慶

樂初太宗平東都破宋金剛其後蘇定方執賀魯李勣平高麗皆備軍容凱歌以入而貞觀顯

慶開元禮並無儀注太常舊有破陣樂應聖期
兩曲歌詞至太和三年始具儀注人補撰二曲
為四
曲云

破陣樂

受律辭元首相將討叛臣咸歌破陣樂共賞太平人

應聖期

聖德期昌運雍熙萬寓清乾坤資化育海嶽共休闢
土欣耕稼銷歌遂偃兵殊方歌帝澤執贄賀昇平

賀聖歡

四海皇風被千年德水清戎衣更不著今日告功成

君臣同慶樂

主聖開昌歷臣忠奉大猷君看偃革後便是太平秋

御定全唐詩卷十五

欽定四庫全書舊要卷一萬七千四百二十一集部

御定全唐詩卷十六

郊廟歌辭

梁郊祀樂章

五代會要曰梁開平二年正月太常奏定郊廟樂曲南郊降神奏慶

和之樂舞崇德之舞皇帝行奏慶順奠玉幣登歌奏慶平迎俎奏慶肅酌獻奏慶熙飲福酒奏慶隆送文舞迎武舞奏慶融亞獻終獻奏慶休送神奏慶和

慶和

趙光逢撰辭

就陽位升圓丘佩雙玉御大裘膺天命擁神休萬靈感

百祿適

秉黃鉞建朱旗震八表清二儀帝業顯王道夷受景命
啟皇基

開九門懷百神通肝蠻接氤氲明梁薦廣樂陳奠嘉璧
燎芳薪

膺寶圖執左契德應天聖饗帝薦表衷荷靈惠壽萬年
祚百世

惟德動天有感必通秉茲一德禋於六宗欽黃寶命恭

肅禮容來顧來享永穆皇風

天惟佑德辟乃奉天交感斯在昭事罔愆歲功已就王道無偏於焉報本是用告虔

慶順

聖皇戾止天步舒遲乾乾睿相穆穆皇儀進退必肅陟降是祇六變克協萬靈協隨

慶平

天命降鑒帝德惟馨享祀不忒禮容孔明奠璧布幣薦

神獻精神祐以荅敷錫永寧

慶肅

張表
撰詞

籩豆簠簋黍稷非馨懿茲奠器厥德惟明金石匏革以
和以平繇此無體一作
騶期乎永寧

慶熙

哲后躬享旨酒斯陳王恭無斁嚴祀維寅皇祖以配大
孝以振宜錫景福永休下民

慶隆

恭祀上帝于國之陽爵醴是荷鴻基永昌

慶融

道和氣兮襲氤氲宣皇規兮彰聖神服遐裔兮敷質文
格苗扈兮息煙塵

慶休

大業來四夷仁風和萬國白日體無私皇天輔有德七
旬罪已服六月師方克偉哉帝道隆終始常作則

慶和

煙燎升禮容徹誠感達人神悅靈貺彰聖情結玉座寂

金爐歌

周郊祀樂章

五代史樂志曰太祖廣順元年邊蔚議改漢十二成為十二順之樂

祭天神奏昭順之樂祭地祇奏寧順之樂祭宗廟奏肅順之樂登歌奠玉帛奏感順之樂皇帝行及臨軒奏治順之樂王公出入送文舞迎武舞奏忠順之樂皇帝食舉奏康順之樂皇帝受朝皇后入宮奏雍順之樂皇太子軒懸出入奏溫順之樂正至皇帝禮會登歌奏禮順之樂郊廟俎入奏禮順之樂酌獻飲福奏福順之樂祭孔宣父齊太公降神同用禮順之樂三公升降及行同用忠順之樂享

璫田同用寧順之樂

昭順樂

五兵勿用萬國咸安告功圓蓋受命雲壇樂鳴鳳律禮
備雞竿神光欲降衆目遐觀

治順樂

羽衛離丹闕金軒赴泰壇珠旗明月色玉佩曉霜寒
黼龍衣備琮黃寶器完百神將受職宗社保長安

感順樂

明君陳大禮展幣祀圓丘雅樂聲聲發祥雲色正浮

禋順樂

黃彝將獻特牲預迎既修昭事潛達明誠

福順樂

相承五運取法三才大禮爰展率土咸來卿雲秘室甘泉寶臺象樽初酌受福不回

福順樂

昊天成命邦國盛儀多士齊列六龍載馳壇升泰一樂奏咸池高明祚德永致昌期

福順樂

上天垂景貺哲后舉鸞觴明德今方祚邦家萬世昌

忠順樂

木鐸敷音文德昌朱干成列武功彰雷鼓鸞羽今休用
玉鉞相參正發揚

武舞樂

圭瓚方陳禮干旄乃象功成文非羽籥猛勢若羆熊

昭順樂

雲門孤竹蒼璧黃琮既祀天地克配祖宗虔修盛禮仰
荅玄功神歸碧落福降無窮

梁太廟樂舞辭

五代會要曰梁開平二年正月太常奏定享太廟樂迎神舞開

平之舞迎俎奏慶肅之樂酌獻奏慶熙飲福酒
奏慶隆送文舞迎武舞奏慶融亞獻終獻奏慶
休唐餘錄曰梁宗廟樂迎神奏開平舞次皇帝
行次帝盥次登歌獻肅祖奏大合之舞恭祖奏
象功之舞憲祖奏來儀之舞列祖奏
昭德之舞次飲福次撤豆次送神

開平舞

黍稷馨醴醑清牲牷潔金石鏗恭祀事結皇情神來格

歌頌聲

皇帝行

莫高者天攀躋弗克濟天有方累仁積德祖宗隆之子
孫履之配天明祀永永孝思

帝盥

莊肅蒞事周旋禮容祿鬯嚴潔穆穆雍雍

登歌

於赫我皇建中立極動以武功靜以文德昭事上帝歡

心萬國大報嚴裡四海述職

大合舞

於穆皇祖濬哲雍熙美溢中夏化被南陲后稷累德公
劉創基肇興九廟樂合來儀

象功舞

天地合德睿聖昭彰累贈太傅俄登魏王雄名不朽奕
葉而光建國之兆君臨萬方

來儀舞

於赫帝命應天順人亭育品彙賓禮

一作穆

百神洪基永

固景命惟新肅恭孝享祚我生民

昭德舞

肅肅文考源濬派長漢稱誕季周實生昌奄有四海超
彼百王笙鏞迭奏禮物熒煌

飲福

夏玉撝金永頌聲縈絲孤竹和且清靈歆醉止犧象盈
自天降福千萬齡

撤豆

笙鏞洋洋庭燎煌煌明星有爛祝史下堂籩豆斯撤禮
容有章克勤克儉無怠無荒

送神

其降無從其往無蹤黍稷非馨有感必通赫奕令德髣髴
髣髴容再拜恍忽遐想昊穹

後唐宗廟樂舞辭

唐餘錄曰後唐並用唐樂無所變更惟別造六室舞辭

祖室奏昭德之舞獻祖室奏文明之舞太祖室奏應天之舞昭宗室奏永平之舞莊宗室奏武

成之舞明宗室
奏雍熙之舞

昭德舞

懿彼明德赫赫煌煌名高閭域功著旂常道符休泰運
叶祺祥慶傳萬祀以播耿光

文明舞

帝業光揚皇圖翕赫聖德孔彰神功不測信及豚魚恩
霑動植懿範鴻名傳之萬億

應天舞

晉國肇興雄圖再固黼黻帝道金玉王度皇天無親惟德是輔載誕英明永光聖祚

永平舞

慶傳瓚祚位正瑤圖功宣四海化被八區靜彰帝道動合乾符千秋萬祀永荷昭蘇

武成舞

崔居儉
撰詞

艱難王業返正皇唐先天再造却日重光漢紹世祖夏資少康功成德茂率祀無疆

雍熙舞

盧文紀
撰詞

仁君御宇寰海謚清運符武德道協文明九成式敘百度惟貞金門積慶玉葉傳榮

漢宗廟樂舞辭

五代史樂志曰漢宗廟酌獻樂舞文祖室奏靈長之舞德祖室

奏積善之舞翼祖室奏顯仁之舞顯祖室奏慶之舞高祖室奏觀德之舞唐餘錄曰高祖追尊四祖廟且遠引漢之二祖為六室張昭因傳會其禮乃曰太祖高皇帝創業垂統室奏武德之舞世祖光武皇帝再造丕基室奏大武之舞自如其舊而大武即用東平王蒼詞云

武德舞

明明我祖天集休明神母夜哭彤雲晝興籩豆有踐管
籥斯登孝孫致告神其降靈

靈長舞

天降祥漢祚昌火炎上水靈長建廟社潔烝嘗羅鐘石
儼珩璜陳玉豆酌金觴氣昭感德馨香祇浴內瞻晉陽
降吾祖福穰穰

積善舞

黍稷斯馨祖德惟明蛇告赤帝龜謀大橫雲行雨施天

成地平造我家邦
幹我璿衡陶匏在御醴盎惟精或戛
或擊載炮載烹飲福受昨舞降歌迎
滔滔不竭洪惟水
行

顯仁舞

運極金行謝天資
水德隆禮神廊時
館布政未央宮詰
旦備明祀登歌荅
茂功雲軒臨降久
星俎薦陳豐霽霽
沈檀霧鏘鏘環佩
風熒煌升藻藉盱
蠁轉珠櫳尊祖咸
韶備貽孫書軌同
京坻長有積宗社
享無窮

章慶舞

采恩曉唱雞人三壯八簋斯陳霧集瑤階瑣闥香生綺
席華茵珠佩貂璫熠燿羽旄千戚紛綸酌醴既終三獻
凝旒何止千春阿閣長棲綵鳳郊宮疊奏祥麟赤伏英
靈未泯玄圭運祚重新玉笋攬樽潏灑龍旂鳳轄逡巡
瞻望月遊冠冕猶疑蒼野四輪

觀德舞

張昭撰辭

高廟明靈再啟圖金根玉輅幸神都巢阿丹鳳銜書命

入昴飛星獻寶符正換薰弦娛赤子忽登仙駕泣蒼梧
薦櫻鶴館笳簫咽酌鬯金楹劒佩趨星俎雲罍薦魯禮
朱干象箭雜巴渝氤氲龍麝交青瑣髣髴錫鑾下藥珠
薦豆奉觴親玉几配天合祖耀璿樞受釐飲酒皇歡洽
仰俟餘靈泰九區

周宗廟樂舞辭

唐餘錄曰周宗廟樂降神奏肅
順皇帝行奏治順獻信祖室奏

肅雍之舞信祖室奏觀成之舞太祖室奏明德
之舞世宗室奏定功之舞酌獻登歌奏感順迎
組奏禮順飲福奏福順送文舞迎武舞奏忠
順武舞奏善順徹俎奏禮順送神奏肅順

肅順

我后至孝祇謁祖先仰瞻廟貌夙設宮懸朱弦疏越羽
舞迴旋神其來格明祀惟虔

治順

清廟將入袞服是依載行載止令色令儀永終就養空
極孝思瞻望如在顧復長違

肅雍舞

周道載興象日之明萬邦咸慶百穀用成於穆聖祖祇

薦鴻名祀於廟社陳其犧牲進旅退旅皇武之形一倡
三歎朱弦之聲以妥以侑既和且平至誠潛達介福攸
寧

章德舞

清廟新展嚴禋恭祖德厚人倫雅樂薦禮器陳儼皇尸
列虞賓神如在聲不聞享必信貌惟黃想龍服奠犧樽
禮既備慶來臻

善慶舞

卜世長帝祚昌定中國服四方修明祀從舊章奏激楚
轉清商羅俎豆列簪裳歌纍纍容皇皇望來格降休祥
祝敢告壽無疆

觀成舞

穆穆王國

一作皇國

奕奕神功誌祀載展明德有融彝樽斯滿

簋簋斯豐紛絺旄

一作旌

羽鏘洋磬鐘或升或降克和克同

孔惠之禮必肅之容錫以純嘏祚其允恭神保是享萬世
無窮

明德舞

惟彼岐陽德大流光載造周室澤及遐荒於鑠聖祖上
帝是皇迺聖迺神知微知彰新廟奕奕豐年穰穰取彼
血膋以往蒸嘗黍稷惟馨籩豆大房工祝致告受福無
疆

咸順

萬舞咸列三階克清貫珠一倡擊石九成盈觴雖酌靈
坐無形永懷我祖達其孝誠

禮順

旨酒既獻嘉肴乃迎振其鼗鼓潔以鉶羹肇禋肇祀或
炮或烹皇尸儼若保饗是明

福順

新廟奕奕金奏洋洋享于祖考循彼典章清醑特滿嘉
玉騰光神醉既告帝祉無疆

忠順

稱文既表溫柔德示武須成蹈厲容綴兆疾舒皆應節

明明我祖樂無窮

善勝舞

五代史樂志曰周廣順元年改郊廟朝會舞名乃改漢治安為政和之舞

振德為善勝之舞觀象為崇德之舞講功為象成之舞

聖祖累功福鍾來裔持羽執干舞文不廢

禋順

禮畢祀先香散几筵罷舞干戚收撤豆籩

肅順

樂奏四順福受萬年神歸碧天庭餘瑞煙

晉朝饗樂章

五代會要曰晉天福四年十二月太常奏正至王公上壽皇帝舉酒

奏玄同之樂皇帝三飲皆奏文同之樂食舉奏昭德之舞次奏成功之舞皇帝降坐奏大同之樂其辭並崔杞等造唐餘錄曰天福五年十一月冬至朝羣臣舉觴奏玄同三爵登歌奏文同四爵登歌作羣臣飲宮縣樂作又奏龜茲及霓裳法曲以須食畢於時衆聞龜茲法曲雅鄭雜舞因已非之明年正旦上壽登歌發聲悲離煩慙如虞殯薤露之音觀者以為不祥

初舉酒文同樂

赫矣昌運明哉聖王文興隆典禮復舊章駕鸞濟濟烏
獸蹌蹌一人有慶萬福無疆

舉酒

大明御宇至德動天君臣慶會禮樂昭宣
劒佩成列金石在懸椒觴再獻寶歷萬年

再舉酒

朝野無事寰瀛大康聖人有作盛禮重光
萬國執玉千官奉觴南山永固地久天長

四舉酒

八表歡無事三秋賀有成照臨同日遠渥澤
並雲行河

變千年色山呼萬歲聲願修封岱禮方以稱文明

羣臣酒行歌

劍佩儼如林齊傾拱北心渥恩頒美祿咸獲聽和音一
德君臣合重瞳日月臨歌時兼樂聖唯待贊泥金
萬國咸歸禹千官共祝堯拜恩瞻鳳宸傾耳聽雲韶運
啟金行遠時和玉燭調酒酣齊抃舞同賀聖明朝
令節陳高會羣臣侍御筵玉墀留愛景金殿靄祥煙振
鷺涵天澤靈禽下樂懸聖明無一事何處讓堯年

周朝饗樂章

唐餘錄曰周元正冬至朝饗樂公卿入奏忠順皇帝坐奏治順羣臣

上壽奏福順皇帝舉壽酒登歌奏康順羣臣降階公卿出並奏忠順

忠順

歲迎更始節及朝元冕旒仰止冠劍相連八音合奏萬
物齊宣常陳盛禮願永千年

忠順

明君當宇列辟奉觴雲容表瑞日影初長衣冠濟濟鐘
磬洋洋令儀克盛嘉會有章

治順

庭陳大樂坐當太微凝旒負宸端拱垂衣駕鸞成列簪
組相輝御爐香散郁郁霏霏

福順

聖皇端拱多士輸忠蠻觴共獻臣心畢同聲齊嵩獄祝
比華封千齡萬祀常保時雍

康順

鴻鈞廣運嘉節良辰列辟在位萬國來賓千旌屢舞金

石咸陳禮容既備帝履長春

忠順

禮成三爵樂畢九成共離金祀復列彤庭

忠順

明庭展禮為龍為光咸韶息韻鸛鷺歸行

晉昭德成功舞歌

唐餘錄曰晉天福五年詔有司復修正至朝會二舞之制

以文舞為昭德之舞武舞為成功之舞十一月冬至遂奏之於時二舞久廢衆喜於復興而樂工舞員雜取教坊以滿之聲節靡曼綴兆合節而無遠促遲速之累及明年正旦再奏聲容蹈

屬進退無列議者非之五代史樂志曰文舞六
十四人左手執籥右手執翟冠進賢冠服黃紗
袍白紗中單皂領襪白練襪白布大口袴革
帶烏皮履白布襪武舞六十四人左手執干右
手執戚服弁平巾幘金支緋絲布大袖緋絲布
襖襠甲金飾白練襪襠錦騰蛇起梁帶豹文大
口布袴
烏皮靴

昭德舞歌二首

聖代修文德明庭舉舊章兩階陳羽籥萬舞合宮商
佩森鴛鷺蕭韶下鳳凰我朝青史上千古有輝光

淮海干戈戢朝廷禮樂施白駒皆就繫丹鳳復來儀德

備三苗格風行萬國隨小臣同百獸率舞賀昌期

武功舞歌二首

撥亂資英主開基自晉陽一戎成大業七德煥前王炎
漢提封遠姬周世祚長朱干將玉戚金象武功揚

睿算超前古神功格上圓百川留禹跡萬國戴堯天既
已橐弓矢誠宜播管弦蹒蹒隨鳥獸共樂太平年

御定全唐詩卷十六

欽定四庫全書薈要卷一萬七千四百二十二

集部

御定全唐詩卷十七

樂府雜曲

鼓吹曲辭

漢有朱鷺等二十二曲列於鼓吹謂之

仍舊名是時吳亦使韋昭改製十二曲其十曲亦
因之晉傅玄製二十二曲惟二曲之名不改舊漢
宋齊並用漢曲又充庭十六曲梁高祖乃去其四
留其十二北齊二十曲皆改古名後周草前代鼓
吹制為十五曲隋制列鼓吹為四
部唐則又增為五部部各有曲

朱鷺

張籍

翩翩兮朱鷺來汎

集作浴

春塘棲綠樹羽毛如翦色如染遠

飛欲下雙翅斂避人引子入深塹動處水紋開濫濫誰
知豪家網爾軀不如飲啄江海隅

艾如張

李賀

錦襜褕繡襦強強

集無下強字

飲啄哺爾雛隴東臥穠滿風

雨莫信

一作逐

龍媒隴西去齊人

一作入

織網如素空張在野春

集作田

平碧中網絲漠漠無形影誤爾觸之傷首紅艾葉綠

花誰翦刻中藏禍機不可測

上之回

盧照鄰

回中道路險蕭關烽候多五營屯北地萬乘出西河單
于拜玉璽天子按琱戈振旅汾川曲秋風橫大歌

同前

李白

三十六離宮樓臺與天通閣道步行月美人愁煙空恩
疎寵不及桃李傷春風淫樂意何極金輿向回中萬乘
出黃道千旗揚彩虹前軍細柳北後騎甘泉東豈問渭
川老寧邀襄野童秋暮

一作但慕

瑶池宴歸來樂未窮

同前

李賀

上之回大旗喜懸虹蜺
集作雲捷鳳尾劒匣破舞蛟龍蚩尤
死鼓逢逢天高慶雷齊墜地地無驚煙海千里

戰城南

盧照鄰

將軍出紫塞冒頓在烏貪笳喧雁門北陣翼龍城南琯
弓夜宛轉鐵騎曉參潭應須駐白日為待戰方酣

同前

李白

去年戰桑乾源今年戰蔥河道洗兵條支海上波放馬

天山雪中草萬里長征戰三軍盡衰老匈奴以殺戮為
耕作古來唯見白骨黃沙田秦家築城徧胡處漢家還
有烽火然烽火然不息征戰一作長征無已時野戰格鬪死敗
馬號鳴向天悲烏鳶啄人腸銜飛上挂枯樹枝一作上枯枝士
卒塗草莽將軍空爾為乃知兵者是凶器聖人不得已
而用之

同前

劉駕

城南征戰多城北無飢餓白骨馬蹄下誰言皆有家城

前水聲苦條忽流萬古莫爭城外地城裏有閒土

同前二首

僧貫休

萬里桑乾傍茫茫古蕃壤將軍貌顚顚撫劍悲年長胡
兵尚陵逼久住亦非強邯鄲少年輩箇箇有伎倆拖槍
半夜去雪片大如掌

磧中

一作石

有陰兵戰馬時驚蹶輕猛李陵心摧殘蘇武節

黃金鎖子甲風吹色如鐵十載不封侯茫茫向誰說

巫山高

鄭世真

巫山凌太清，峒巖類削成。
霏霏暮雨合，靄靄朝雲生。
危峰入鳥道，深谷瀉猿聲。
別有幽棲客，淹留攀桂情。

同前二前

沈佺期

巫山峰十二，環合

集作合峒

隱昭回。俯眺琵琶峽，平看雲雨臺。

古槎天外倚，瀑水日邊來。
何忽啼猿夜，荆王枕席開。

神女向高唐，巫山下夕陽。
裴回作行雨，婉孌逐荆王。
電影江前落，雷聲峽外長。
霽雲無處所，臺館曉蒼蒼。

同前

盧照鄰

巫山望不極望望下朝雲

集作氛

莫辨啼猿樹徒看神女雲

驚濤亂水脈驟雨暗峰文
霓裳即此地況復遠思君

同前

張循之

巫山高不極沓

一作合

沓狀奇新暗谷疑風雨幽巖

集作崖

若鬼

神月明三峽曙

集作曉

潮滿二

集作九

江春為問陽臺夕

集作客

應知

入夢人

同前

劉方平

楚國巫山秀清猿日夜啼萬重春樹合十二碧峰齊峽

出朝雲下江來暮雨西陽臺歸路直不畏向家迷

同前

皇甫冉

巫峽見巴東迢迢半出空雲藏神女館雨到楚王宮朝
暮泉聲落寒暄樹色同清猿不可聽偏在九秋中

同前

李端

巫山十二峰皆在碧虛中回合雲藏日

集作月

霏微雨帶風

猿聲寒過水

集作澗

樹色暮連空愁向高唐望清秋見楚宮

同前

于漬

何山無朝雲彼雲亦悠揚何山無暮雨彼雨亦蒼茫宋
玉恃才者憑雲構高唐自重集作垂文賦名荒淫歸楚襄峨
峨十二峰永作妖鬼鄉

同前二首

孟郊

巴山上峽重復重陽臺碧峭十二峰荆王獵時逢暮雨
夜臥高丘夢神女輕紅流煙溼豔姿行雲飛去明星稀
目極魂斷望不見猿啼三聲淚霑衣

見盡數萬里不聞三聲猿但飛蕭蕭雨中有亭亭魂千

載楚襄

一作王

恨遺文宋玉言至今青冥裏

集作晴
明天

雲結深閨

門

同前

李賀

碧叢叢高

一作齊

插天大江翻瀾神電煙楚魂尋夢風颺

一作颺

然曉風飛雨生苔錢瑤姬一去一千年丁香筇竹啼老

猿古祠近月蟾桂寒椒花墜紅溼雲間

一作端

同前

僧齊已

巫山高巫女妖雨為暮兮雲為朝楚王顛顚魂欲銷秋

猿嘯嘯日將夕紅霞紫煙凝老壁千巖萬壑花皆坼但
恐芳菲無正色不知今古行人行幾人經此無秋情雲
深廟遠不可覓十二峰頭插天碧

將進酒

李白

君不見黃河之水天上來奔流到海不復回君不見高
堂明鏡悲白髮朝如青絲暮成雪人生得意須盡歡莫
使金尊空對月天生我材必有用千金散盡還復來烹
羊宰牛且為樂會須一飲三百杯岑夫子丹丘生將進

酒杯

一作君

莫停與君歌一曲請君為我側耳聽鐘鼓饌王

不足貴但願長醉不復醒古來聖賢

一作賢達

皆寂莫惟有飲

者留其名陳王昔時宴平樂斗酒十千恣歡謔主人何

為言少錢徑須酤取

一作酒

對君酌五花馬千金裘呼兒將

出換美酒與爾同銷萬古愁

同前

元稹

將進酒將進酒酒中有毒酖主父言之主父傷主母母
為妾地父妾天仰天俯地不忍言佯為僵踣主父前主

父不知加妾鞭旁人知妾為主說主將淚洗鞭頭血推

推

集作推

主母牽下堂扶妾遣升堂上牀將進酒酒中無毒

令主壽願主回思

集作思

歸主母遣妾如此事

一作由

主父妾為

此事人偶知自慙不密方自悲主今顛倒安置妾貪天
僭地誰不為

同前

李賀

瑠璃鍾琥珀濃小槽酒滴真珠紅烹龍炮鳳玉脂泣羅
屏繡幕圍香風吹龍笛擊鼉鼓皓齒歌細腰舞況是青

春日將暮桃花亂落如紅雨勸君終日酩酊醉酒不到
劉伶墳上土

君馬黃

李白

君馬黃我馬白馬色雖不同人心本無隔共作遊冶盤
雙行洛陽陌長劍既照耀高冠何艷赫各有千金裘俱
為五侯客猛虎落陷穽壯夫時屈厄相知在急難獨好

亦

一作知

何益

芳樹

沈佺期

何地早芳菲宛在長門殿天桃色若綬穠李光如練啼
鳥弄花疎遊蠶飲香徧歎息春風起飄零君不見

同前

盧照鄰

芳樹本多奇年華復在斯結翠成新幄開紅滿舊集作故枝
風歸花歷亂日度影參差容色朝朝落思君君不知

同前

徐彥伯

玉花珍簾上金縷畫屏開曉月憐簾柱春風憶鏡臺簾
柱春風吹曉月芳樹落花朝暝歇藁砧刀頭未有時攀

條拭淚坐相思

同前

韋應物

迢迢芳園樹列映清池曲對此傷人心還如故時綠風
條灑餘靄露葉承新旭佳人不再攀下有往來躅

同前

元稹

芳樹已寥落孤英尤可嘉可憐團團葉蓋覆深深花遊
蠶競攢刺鬬雀亦紛拏天生細碎物不愛好光華非無
殲殄法念爾有生涯春雷一聲發驚燕亦驚蛇清池養

神蔡已復長蝦蟇雨露貴平施吾其春草芽

同前 羅隱

細藥

集作夢

慢逐風暖香閒破鼻青帝固有心時時動人

集作漏天

意去年高枝猶壓地今年低枝已顛顛吾所以見造化
之權變通之理春夏作頭秋冬為尾循環反覆無窮已
今集作人生長短同一軌若使威可以制力可以止秦皇不
肯斂手下沙丘孟賁不合低頭入蒿里伊人彊猛猶如
此顧我勞生何足恃但願開素袍傾綠蟻陶兀兀大

醉於青冥集作宵白晝間任他上是天下是地

有所思 沈佺期

君子事行役再空芳歲期美人曠延佇萬里浮雲思園
槿綻紅豔郊桑柔綠滋坐看長夏晚秋月生集作照羅幃

同前 李白

我思仙一作佳人乃在碧海之東隅海寒多天風白波連山

一作天倒蓬壺長鯨噴湧不可涉撫心茫茫淚如珠西來青

鳥東飛去願寄一書謝麻姑

同前

孟郊

桔槔烽火晝不滅客路迢迢信難越古鎮刀攢萬片霜
寒江浪起千堆雪此時西去定如何空使南心遠淒切

同前

盧仝

當時我醉美人家美人顏色嬌如花今日美人棄我去
青樓珠箔天之涯天涯娟娟常娥月三五二八盈又缺
翠眉蟬鬢生別離一望不見心斷絕心斷絕幾千里夢
中醉臥巫山雲覺來淚滴湘江水湘江兩岸花木深美

人不見愁人心含愁更奏綠綺琴調高弦絕無知音美人兮美人不知為暮雨兮為朝雲相思一夜梅花發忽到窗前疑是君

同前

韋應物

借問江

集作堤

上柳青青為誰春空遊昨日地不見昨日人

繚繞萬家井往來車馬塵莫道無相識要非心所親

同前

劉氏雲

朝亦有所思暮亦有所思登樓望君處藹藹浮雲飛

集作

雷雲蕭
關道

浮雲遮却陽關道向晚誰知妾懷抱

集作掩淚向浮雲誰知妾懷抱

玉

井蒼苔春

集作青

院深桐花落地

集作盡

無人埽

雉子班

李白

辟邪伎作鼓吹驚雉子班之奏曲成喔咿振迅欲飛鳴
扇錦翼雄風生雙雌同飲啄趨悍誰能爭乍向草中耿
介死不求黃金籠下生天地至廣大何惜遂物情善卷
讓天子務光亦逃名所貴曠士懷朗然合太清

臨高臺

褚亮

高臺暫俯臨飛翼聳輕音浮光隨日度漾影逐波深迴
瞰周平野開懷暢遠襟獨此三休上還傷千歲心

同前

王勃

臨高臺高臺迢遞絕浮埃瑤軒綺構何崔嵬鸞歌鳳吹
清且哀俯瞰長安道萋萋御溝草斜對甘泉路蒼蒼茂
陵樹高臺四望同帝鄉佳氣鬱蔥蔥紫閣丹樓紛照曜
壁房錦殿相玲瓏東彌長樂觀西指未央宮赤城映朝
日綠樹搖春風旗亭百隊開新市甲第千甍分戚里朱

輪翠蓋不勝春疊樹層

一作重

楹相對起復有青樓大道中

繡戶文窗雕綺櫳錦衣畫

集作
衾夜

不褰羅幃夕

集作
畫

未空歌屏

朝拚翠妝鏡晚窺紅為吾

集作
君

安寶髻蛾眉罷花叢狹路

塵間黯將暮雲間月色明如素鴛鴦池上兩兩飛鳳皇

樓下雙雙度物色正如此佳期那不顧銀鞍繡轂盛繁

華可憐今夜宿倡家倡家少婦不須嚔東園桃李片時

春君看舊日高臺處柏梁銅雀生黃塵

同前

僧貫休

涼風吹遠念使我升高臺寧知數片雲不是舊山來故人天一涯久客殊未回雁來不得書空寄聲哀哀

黃雀行

莊南傑

穿屋穿牆不知止爭樹爭巢入營死林間公子挾彈弓
一丸致斃花叢裏小雛黃口未有知青天不解高高飛
虞人設網當要路白日啾嘲禍萬機

釣竿篇

沈佺期

朝日斂紅煙垂竿向綠川人疑天上坐魚似鏡中懸避

櫂時驚透猜鉤每誤牽湍危不理轄潭靜欲留船釣玉

君徒尚徵金我未賢為看芳

一作方

餌下貪得會無全

集作荃

凱歌六首

岑參

天寶中回紇寇邊常清出師
征之及破播仙奏捷獻凱乃作凱歌

漢將承恩西破戎捷書先奏未央宮天子預開麟閣待

祇今誰數貳師功

官軍西出過樓蘭營幕傍臨月窟寒蒲海曉霜凝劍

集作馬

尾蔥山夜雪撲旌竿

鳴笳搥

集作疊

鼓擁回軍破國平蕃昔未聞大夫鵲印搖邊

月天

集作大

將龍旗，擥海雲。

月落轅門鼓角鳴，千羣面縛出蕃城。
洗兵魚海雲迎陣，秣馬龍堆月照營。

蕃軍遙見漢家營，滿谷連山徧哭聲。
萬箭千刀一夜殺，平明流血浸空城。

暮雨旌旗溼未乾，胡塵

集作煙

白草日光寒。昨夜將軍連曉

戰，蕃軍只見馬空鞍。

鼓吹鐃歌

柳宗元私作而未嘗奏或雖奏而未嘗用故不被於歌

按此十二曲史書不載疑宗元

晉陽武

晉陽武言隋亂既極唐師起晉陽平姦豪為生
人義主以仁興武也第一

晉陽武奮義威煬之渝德焉歸氓畢屠綏者誰皇烈烈
專天機號以仁揚其旗日之升九土晞斥田圻流洪輝
有其二翼餘隋斲梟驚連熊螭枯以肉勅者羸后土蕩
玄穹彌合之育莽然施惟德輔慶無期

晉陽武二十六句句三字

獸之窮

獸之窮言李密自邕山之敗其下皆貳霸王之
業知天授在唐遂歸於有道享我爵命也第二
獸之窮奔大麓天厚黃德狙獷服甲之橐弓弭矢箠皇
旅靖敵逾感自亡其徒匪予戮屈轂猛虔慄慄以尺
組噉以秩黎之陽土茫茫富兵戎盈倉箱乏者德莫能
享驅豺兕授我疆

獸之窮二十二句其十八句句三字四句

句四字

獸武牢

獸武牢言太宗師討王充實建德助逆師奮擊
武牢下擒之遂降充也第三

戰武牢動河朔逆之助圖掎角怒轂靡抗喬嶽翹萌芽
傲霜電王謀內定申掌握鋪施芟夷二主縛憚華戎廓
封略命之膏卑以斡歸有德唯先覺

戰武牢十八句其十六句句三字二句句

四字

涇水黃

涇水黃言薛舉據涇以死其子仁杲尤勇以暴
師平之也第四

涇水黃隴野茫負太白騰天狼有鳥驚立羽翼張鉤喙

決前鉅

一作鉅

超傍怒飛飢嘯不可當老雄死子復良巢

岐飲渭肆翱翔頓地紘提天綱列缺掉幟招搖耀鎗鬼
神來助夢嘉祥腦塗原野魂飛揚星辰復恢一方

涇水黃二十四句其十五句句三字九句

句四字

奔鯨沛

奔鯨沛言輔氏憑江淮竟東海命將平之也第

五

奔鯨沛盪海垠吐霓翳日腥浮雲帝怒下顧哀墊昏受
以神柄推元臣手援天矛截修鱗披攘蒙霧開海門地
平水靜浮天垠

集作根

義和顯耀乘清氛赫炎溥暢融大鈞

奔鯨沛十八句其十句句三字八句句四
字

苞枿

苞枿言梁之餘保荆衡巴巫窮南越良將取之
不以師也第六

苞枿黜矣惟根之蟠彌巴蔽荆負南極以安曰我舊梁
氏輯綏艱難江漢之阻都邑固以完聖人作神武用有
臣勇智奮不以衆投跡死地謀猷縱化敵為家慮則中

浩浩海裔不威而同係縲降王定厥功澶漫萬里宣唐
風蠻夷九譯咸來從凱旋金奏象形容震赫萬國罔不
龔

苞拊二十八句其十六句句四字三句句
五字九句句三字

河右平

河右平言李軌保河右師臨之不克變或執以
降也第七

河右澶漫頑為之魁王師如雷震崑崙以積上聳下聰
驚不可迴助讎抗有德惟人之災乃潰乃奮執縛歸厥
命萬室蒙其仁一夫則病濡以鴻澤皇之聖威畏德懷
功以定順之于理物咸遂厥性

河右平十八句句其十一句句四字五句句
五字二句句三字

鐵山碎

鐵山碎言突厥之大古夷狄莫彊焉師大破之

降其國告于廟也第八

鐵山碎大漠舒二虜勁連穹廬背北海專坤隅歲來侵
邊或傳于都天子命元師奮其雄圖破定襄降魁渠窮
竟窟宅斥余吾百蠻破膽邊氓蘇威武輝耀明鬼區利
澤彌萬祀功不可踰官臣拜手惟帝之謨

鐵山碎二十二句句其十一句句三字九句
句四字二句句五字

靖本邦

靖本邦言劉武周敗裴寂咸有晉地太宗滅之
也第九

本邦伊晉惟時不靖根柢之搖枝葉攸病守臣不任勦
於神聖惟鉞之興翦焉則定洪惟我理式和以敬羣頑
既夷庶績咸正皇謨載大惟人之慶

靖本邦十四句句四字

吐谷渾

吐谷渾言李靖滅吐谷渾於西海上也第十

吐谷渾盛彊背西海以夸歲侵擾我疆退匿險且遐帝
謂神武師往征靖皇家烈烈旆其旗熊虎雜龍蛇王旅
千萬人銜枚默無譁束刃踰山徼張翼縱漠沙一舉刈
羶腥尸骸積如麻除惡務本根況敢遺萌牙洋洋西海
水威命窮天涯係虜來王都犒樂窮休嘉登高望還師
竟野如春華行者靡不歸親戚謹要遮凱旋獻清廟萬
國思無邪

吐谷渾二十六句句五字

高昌

高昌言李靖滅高昌也第十一

麴氏雄西北別絕臣外區既恃遠且險縱傲不我虞烈
烈王者師熊螭以為徒龍旂翻海浪駟騎馳坤隅賁育
搏嬰兒一掃不復餘平沙際天極但見黃雲驅臣靖執
長纓智勇伏囚拘文皇南面坐夷狄千羣趨咸稱天子
神往古不得俱獻號天可汗以覆我國都兵戎不交害
各保性與軀

高昌二十二句句五字

東蠻

東蠻言既克東蠻羣臣請圖蠻夷狀如周書王會也第十二

東蠻有謝氏冠帶理海中自言我異世雖聖莫能通王
卒如飛翰鵬騫駭羣龍轟然自天墜乃信神武功繫虜
君臣人累累來自東無思不服從唐業如山崇百辟拜
稽首咸願圖形容如周王會書永永傳無窮睢盱萬狀

乖咿嗚九譯重廣輪撫四海浩浩知皇風歌詩鐃鼓間
以壯我元戎

東蠻二十二句句五字

御定全唐詩卷十七

欽定四庫全書薈要卷一萬七千四百二十三

集部

御定全唐詩卷十八

橫吹曲辭

橫吹曲其始亦謂之鼓吹馬上奏之蓋軍中之樂也其後分為二部有簫笳者

為鼓吹用之朝會道路亦以給賜有鼓角者為橫吹用之軍中自隋以後始以橫吹與鼓吹列為四部以供大駕及皇太子王公等唐制太常鼓吹令掌鼓吹施用調習之節以脩鹵簿之儀而分五部一曰鼓吹部其樂器有柷鼓金鉦大鼓小鼓長鳴角次鳴角六種柷鼓一曲十疊大鼓十五曲嚴用三曲警用十二曲金鉦無曲以為鼓節小鼓九曲上馬用一曲嚴警用八曲長鳴一曲三聲上馬嚴警用之中鳴一曲三聲用與長鳴同二曰羽葆部其樂器有歌鼓簫笳鐃于五種凡十八曲三曰鈞

吹部其樂器與羽葆部同凡七曲四曰大橫吹部其樂器有角節鼓笛簫簞簞笳桃皮簞簞七種凡二十四曲五曰小橫吹部其樂器有角笛簫簞簞笳桃皮簞簞六種其曲不見疑同用大橫吹曲也凡大駕行幸則夜警晨嚴大駕夜警十二曲中警七曲晨嚴三通皇太子夜警九曲公卿以下夜警七曲晨嚴並三通夜警衆一曲轉次而振也

隴頭

張籍一曰隴頭水

隴頭已

集作路

斷人不行胡騎夜入涼州城漢家處處格鬪

死一朝盡沒隴西地驅我邊人胡中去散放牛羊食禾

黍去年中國養子孫今著氍毹學胡語誰能更使李輕

車收取涼州屬

集作入

漢家

隴頭吟

王維

長安少年遊俠客
夜上戍樓看太白
隴頭明月迴臨關
隴上行人夜吹笛
關西老將不勝愁
駐馬聽之雙淚流
身經大小百餘戰
麾下偏裨萬戶侯
蘇武纔為典屬國

節旄空

集作落

盡海西頭

同前

翁綬

隴水潺湲隴樹黃
征人隴上盡思鄉
馬嘶斜日朔風急

雁過寒雲邊思長殘月出林明劒戟平沙隔水見牛羊
橫行俱足一作是封侯者誰斬樓蘭獻未央

隴頭水

楊師道

隴頭秋月明隴水帶關城笳添離別曲風送斷腸聲映
雪峰猶暗乘冰馬屢驚霧中寒雁至沙上轉蓬輕天山
傳羽檄漢地急徵兵陣開都護道劒聚伏波營於茲覺
無度方共濯胡纓

同前

盧照鄰

隴坂高無極，征人一望鄉。
關河別去水，沙塞斷歸腸。
馬繫千年樹，旌懸九月霜。
從來共嗚咽，皆是為勤王。

同前

王建

隴水何年隴頭別，不在山中亦嗚咽。

一作爲亦咽

征人塞耳馬

不行，未到隴頭聞水聲。謂是西流入蒲海，還聞北海

一作去

繞龍城。隴東隴西多屈曲，野廩飲水長簇簇。胡兵夜回水傍住，憶著來時磨劒處。向前無井復無泉，放馬回看隴頭樹。

同前

于湏

借問隴頭水終年恨何事深疑嗚咽聲中有征人淚昨

日上山下達曙不能寐何處接長波東流入清渭

集本前四句與

羅隱詩
全同

同前

僧皎然

隴頭心欲絕隴水不堪聞碎影搖槍壘寒聲咽帳軍素
從鹽海積綠帶柳城分日落天邊望逶迤入塞雲

秦隴逼氐羌征人去未央如何幽咽水并欲斷君腸西

注悲窮漠東分憶故鄉旅魂聲攪亂無夢到遼陽

同前

鮑溶

隴頭水千古不堪聞生歸蘇屬國死別李將軍細響風
凋草清哀雁落雲

同前

羅隱

借問隴頭水年年恨何事全疑嗚咽聲中有征人淚自
古無長策況我非深智何計謝潺湲一宵空不寐

出關

魏徵

中原還

集作初

逐鹿投筆事戎軒縱橫計不就慷慨志猶存

策杖謁天子驅馬出關門請纓羈

集作繫

南越憑軾下東藩

鬱紆陟高岫出沒望平原古木吟寒鳥空山啼夜猿既
傷千里目還驚九折魂豈不憚艱險深懷國士恩季布
無二諾侯嬴重一言人生感意氣功名誰復論

入關

賈馳

河上微風來關頭樹初溼今朝關城吏又見孤客入上
國誰與期西來徒自急

同前 張祐

都城連百二

集作三百里

雄險北

一作此

回環地勢遙尊岳河流側

讓關秦皇曾虎視漢祖亦

集作此

龍顏何事梟兇輩干戈自

不聞

出塞 實威

匈奴屢不平漢將欲縱橫看雲方結陣却月始連營潛
軍渡馬邑揚旆掩龍城會勒燕然石方傳車騎名

同前 陳子昂

忽聞天上將關塞重橫行始返樓蘭國還向朔方城黃
金裝戰馬白羽集神兵星月開天陣山川列地營晚風
吹畫角春色耀飛旌寧知班定遠獨集作猶是一書生

同前

張易之

俠客重恩光

集作駿

馬飾金裝瞥聞傳羽檄馳突救邊荒

轉戰磨笄地橫行戴斗鄉將軍占太白小婦怨流黃驤
褭青絲騎娉婷紅粉妝一春鶯度曲八月雁成行誰堪
坐秋思羅袖拂空牀

同前

沈佺期

十年通大漠萬里出長平
寒日生戈劒陰雲搖旆旌
飢烏啼舊壘疲馬戀空城
辛苦蘭皋北胡霜損漢兵

同前

王維

居延城外獵天驕白草連天野
火燒暮雲空磧時驅馬
秋日平原好射鵬護羌校尉朝
乘障破虜將軍夜渡遼
玉靶角弓珠勒馬漢家將賜霍嫖姚

同前

王昌齡

秦時明月漢時關萬里長征人未還但使龍城飛將在
不教胡馬度陰山

白花垣上望京師黃河水流無盡時窮秋曠野行人絕
馬首東來知是誰

同前

馬戴

金帶連環束戰袍馬頭衝雪度臨洮卷旗夜劫單于帳

亂斫胡兵

集作兒

缺寶刀

前出塞九首

杜甫

戚戚去故里悠悠赴交河公家有程期亡命嬰禍羅君
已富士境開邊一何多棄絕父母恩吞聲行負戈
出門日已遠不受徒旅欺骨肉恩豈斷男兒死無時走
馬脫轡頭手中挑青絲捷下萬仞岡俯身試褰旗
磨刀鳴咽水水赤刃傷手欲輕腸斷聲心緒亂已久丈
夫誓許國憤惋復何有功名圖麒麟戰骨當速朽
送徒既有長遠戍亦有身生死向前去不勞吏怒嗔路
逢相識人附書與六親哀哉兩決絕不復同苦辛

迢迢萬餘里領我赴三軍軍中異苦樂主將寧盡聞隔

河見胡騎倏忽數百羣我始為奴僕幾時樹功勲

挽弓當挽彊用箭當用長射人先射馬擒賊先擒王殺

人亦有限列國自有疆苟能制侵陵豈在多殺傷

驅馬天雨雪軍行入高山逕危抱寒石指落曾冰間已

去漢月遠何時築城還浮雲暮南征可望不可攀

單于寇我壘百里風塵昏雄劍四五動彼軍為我奔虜

其名王歸繫頸授轅門潛身備行列一勝何足論

從軍十年餘能無分寸功衆人貴苟得欲語羞雷同
中原有鬪爭況在狄與戎丈夫四方志安可辭固窮

後出塞五首

杜甫

男兒生世間及壯當封侯戰伐有功業焉能守舊丘
召募赴薊門軍動不可留千金買馬鞭一作鞍百金裝刀頭
聞里送我行親戚擁道周斑白居易上列酒酣進庶羞
少年別有贈含笑看吳鉤

朝進東門營暮上河陽橋落日照大旗馬鳴風蕭蕭平

沙列萬幕部伍各見招中天懸明月令嚴夜寂寥悲笳
數聲動壯士慘不驕借問大將誰恐是霍嫖姚

古人重守邊今人重高勲豈知英雄主出師亘長雲六
合已一家四夷且孤軍遂使貔虎士奮身勇所聞拔劍
擊大荒日牧一作收胡馬羣誓開玄冥北持以奉吾君

獻凱日繼踵兩蕃靜無虞漁陽豪俠地擊鼓吹笙竽雲
帆轉遼海粳稻來東吳越羅與楚練照耀興臺軀主將
位益崇氣驕陵上都邊人不敢議議者死路衢

我本良家子出師亦多門將驕益愁思身貴不足論躍
馬二十年恐辜明主恩坐見幽州騎長驅河洛昏中夜
間道歸故里但空村惡名幸脫免窮老無兒孫

出塞

皇甫冉

吹角出塞門前瞻即胡地三軍盡回首皆灑望鄉淚轉
念關山長行看風景異由來征戍客各負

集作
負得

輕生義

同前

王之渙

黃沙直

集作
河遠

上白雲間一片孤城萬仞山羌笛何須怨楊

柳春光不度玉門關

同前 耿緯

漢家邊事重實憲出臨戎絕漠秋山在陽關舊路通列
營依茂草吹角向高風更就燕然石看銘破集作行看奏虜功

同前 張籍

秋塞雪初下將軍遠出師分營長記火放馬不收旗月
冷邊帳溼沙昏夜探遲征人皆白首誰見滅胡時

同前 劉駕

胡風不開花四氣多作雪北人尚凍死況我本南越古
來犬羊地巡狩無遺轍九土耕不盡武皇猶征伐中天
有高閣圖畫何時歇坐恐塞上山低於砂中骨

出塞曲

劉濟

將軍在重圍音信絕不通羽書如流星飛入甘泉宮倚
是并州兒少年心膽雄一朝隨召募百戰爭王公去年
桑乾北今年桑乾東死是征人死功是將軍功汗馬牧
秋月疲兵臥霜風仍聞左賢王更欲圖雲中

同前 于鵠

微雪將軍

集作軍將

出吹笳天未明觀兵登古戍斬將對雙旌

分陣瞻山勢潛軍

集作兵

制馬鳴如今新

集作青

史上已有滅胡

名

單于驕愛獵放火到軍城待

集作乘

月調新弩

集作馬

防秋置遠

營空山朱戟影寒磧鐵衣聲逢著降

集作度水逢

胡說陰山有

伏兵

同前 僧貫休

埽盡狂胡跡回戈

集作頭

望故關相逢唯死鬪豈易得生還

縱宴參胡樂收兵過雪山不封十萬戶此事亦應閒

玉帳將軍意慙慙把酒論功高寧在我陣沒與招魂塞
色干戈束軍容喜氣屯男兒今始是敢出玉關門

回首隴山頭連天草木秋聖君應入夢半路遣封侯水
不擔陰雪柴令倒戍樓歸來麟閣上春色滿皇州

入塞

劉希夷

將軍陷虜圍邊務息戎機霜雪交河盡旌旗入塞飛曉

光隨馬度春色伴人歸課績朝明主臨軒拜武威

入塞曲

耿緯

將軍帶十圍重錦製戎衣援臂銷弓力虯鬚長劒威首
登平樂宴新破大宛歸樓上姝姬笑門前問客稀暮烽
玄菟急秋草紫騮肥未奉君王詔高槐晝掩扉

同前

僧貫休

單于烽火動都護去天涯別賜黃金甲親臨白玉墀塞
垣須靜謐師旅審安危定遠條支寵如今勝古時

方見將軍貴分明對冕旒聖恩如遠被狂虜不難收臣
節唯期死功勲敢望侯終辭修里第從此出皇州
百里精兵動參差便渡遼如何好白日亦照此天驕遠
樹深疑賊驚蓬迴似鵬凱歌何日唱磧路共天遙

同前

沈彬

欲為皇王服遠戎萬人金甲鼓鼙中陣雲暗塞三邊黑
兵血愁天一片紅半夜翻營旗攬月深秋防戍劒磨風
謗書未及明君熟臥骨將軍已殁功

苦戰沙間臥箭痕戍樓開上望星文生希國澤分偏將
死奪河源答聖君爲覩敗兵眠白草馬驚邊鬼哭陰雲
功多地遠無人紀漢閣笙歌日又曛

折楊柳

盧照鄰

唐書樂志

曰梁樂府有胡吹

歌即鼓角橫吹曲折楊柳是也按古樂

府又有小折楊柳相和大曲有折楊柳行清
商四曲有月節折楊柳歌十三曲與此不同

倡樓啓曙扉園

集作揚

柳正依依鳥鳴知歲隔條變識春歸

露葉凝啼臉

集作秋葉

風花亂舞衣攀折聊將寄軍中書

集作音

信

稀

同前 沈佺期

玉窗朝日映羅帳春風吹拭淚攀楊柳長條宛地垂白
花飛歷亂黃鳥思參差妾自肝腸斷旁人那得知

同前 喬知之

可憐濯濯春楊柳攀折將來就纖手妾容與此同盛衰
何必君恩獨能久

同前 劉憲

沙塞三河道金閨二月春碧煙楊柳色紅粉綺羅人露

葉憐啼臉風花思舞巾攀持君不見為聽曲中新

同前

崔湜

二月風光半三邊戍不還年華妾自惜楊柳為君攀落

絮緣

集竹
縈

衫袖垂條拂髻鬟那堪音信斷流涕望陽關

同前

韋承慶

萬里邊城地三春楊柳節葉似鏡中眉花如關外雪征
人遠鄉思倡婦高樓別不忍擲年華含情寄攀折

同前

歐陽瑾

垂柳拂妝臺，葳蕤葉半開。
年華枝上見，邊思曲中來。
嫩色宜新雨，輕花伴落梅。
朝朝倦攀折，征戍幾時回。

同前

張祐

紅粉青樓曙，垂楊仲月春。
懷君重攀折，非妾妬腰身。
舞帶紫絲斷，嬌娥向葉嚬。
橫吹凡幾曲，獨自最愁人。

同前

張九齡

纖纖折楊柳，持此寄情人。
一枝何足貴，憐是故園春。
遲景那能久，流芳不及新。
更愁征戍客，鬢老邊城塵。

同前 余延壽

大道連國門東西種楊柳歲華君不見
裏娜垂來久綠枝棲暝禽雄去雌獨吟
餘花怨春盡微月起秋陰坐望窗中蝶
起攀枝上葉好風吹長條婀娜何如妾
妾見柳園新高樓四五春莫吹胡塞

一作姑

曲愁殺隴頭人

同前 李白

垂楊拂綠水搖艷

一作艷

東風年花明玉關雪葉暖金窗煙

美人結長恨

集作想

相對

集作對此

心悽然攀條折春色遠寄龍庭

前

一作龍
沙邊

同前

孟郊

楊柳多短枝短枝多別離贈遠累

集作
屢

攀折柔條安得垂

青春有定節離別無定時但恐人別促不怨來遲遲莫

言短枝條中有長相思朱顏與綠楊并在別離期

樓上春風過風前楊柳歌枝疎緣別苦曲怨為年多花

驚燕地雪葉映楚池波誰堪別離此征戍在交河

同前

李端

東城攀柳葉柳葉低著草少壯莫輕年輕年有人

集作哀

老

柳發徧川岡登高堪斷腸雨煙輕漠漠何樹近君鄉贈

君折楊柳顏色豈能久上客莫需巾佳人正回首新柳

送君行古柳傷君情突兀臨荒渡婆娑出舊營隋家兩

岸盡陶宅五株平

集作榮

日暮偏愁望春山有鳥聲

同前

翁緩

紫陌金堤映綺羅遊人處處動離歌陰移古戍迷荒草
花帶殘陽落遠波臺上少年吹白雪樓中思婦斂青蛾

殷勤攀折贈行客此去關山雨雪多

望行人

王建

自從江樹秋日日上

一作望

江樓夢見離珠浦書來在桂州

不

一作願

同魚比目終恨水分流久不開明鏡多應是白頭

同前

張籍

秋風窗下起旅雁向南飛日日出門望家家行客歸無

因見邊使空待寄寒衣獨閉

集作倚

青樓暮煙深鳥雀稀

關山月

盧照鄰有度關山亦類此也

按相和曲

塞垣通碣石虜障抵祁連相思在萬里明月正孤懸影
移金岫北光斷玉門前寄書集作言謝中婦時看鴻雁天

同前

沈佺期

漢月生遼海瞳矐出半暉合昏玄兔一作兔郡中夜白登圍
暈落關山迴光含霜霰微將軍聽曉角戰馬欲南歸

同前

李白

明月出天山蒼茫雲海間長風幾萬里吹度玉門關漢
下白登道胡窺青海灣由來征戰地不見有人還戍客

望邊色一作色思歸多苦顏高樓當此夜歎息未應聞

同前長孫佐輔

淒淒還切切戍客多離別何處最傷心關山見秋月關

月竟如何由來遠近過始經玄兔一作兔塞終繞白狼河忽

憶秦樓婦流光應共有已得並蛾眉還知攬纖手去歲

照同行比翼復連形今宵照獨立顧影自煒煒餘暉漸

西落夜夜看如昨借問映旌旗何如鑒帷幕拂曉朔風

悲蓬驚雁不飛幾時征戍罷還向月中歸

同前

耿緯

月明邊徼靜戍客望鄉時塞古柳衰盡關寒榆發遲蒼
蒼萬里道戚戚十年悲今夜青樓上還應照一作有所思

同前二首

戴叔倫

月出照關山秋風人未還清光無遠近鄉淚半書間
一雁過連營繁霜覆古城胡笳在何處半夜起邊聲

同前

崔融

月生西海上氣逐邊風壯萬里度關山蒼茫非一狀漢

兵開郡國故馬窺亭障夜夜聞悲笳征人起南望

同前

李端

露溼月蒼蒼關頭榆葉黃回輪照海遠分彩上樓長水
凍頻移幕兵疲數望鄉祇應城影外萬里共如霜

集作胡

同前

王建

關山月營開道白前軍發凍輪當磧光悠悠照見三堆
兩堆骨邊風割面天欲明金沙一作沙嶺西看看沒

同前

張籍

秋月朗朗關山上
山中行人馬蹄響
關山秋來雨雪多
行人見月唱邊歌
海邊漠漠天氣白
胡兒夜度黃龍磧
軍中探騎暮出城
伏兵暗處低旌戟
溪水連地集作天霜草
平野馳尋水磧中
鳴隴頭風急雁不
下沙場苦戰多流
星可憐萬國關山
道年年戰骨多秋
草

同前

翁綬

裴回漢月滿邊州
照盡天涯到隴頭
影轉銀河寰海靜
光分玉塞古今愁
笳吹遠戍孤烽滅
雁下平沙萬里秋

況是故園搖落夜那堪少婦獨登樓

同前

鮑氏君微

高高秋月明北照遼陽城塞迴光初滿風多暈更生征

人望鄉思戰馬聞鞞驚

一作聲

朔風悲邊草胡沙昏

一作暗

虜營

霜疑匣中劒風憊原上旌早晚謁金闕不聞刁斗聲

一作鳴

洛陽道

于武陵

浮世若浮雲千回故復新旋添青草冢更有白頭人歲暮客將老雪晴山欲春行行車與馬不盡洛陽塵

同前 鄭渥

客亭門外路東西多少喧騰事不齊楊柳惹鞭公子醉
紆麻掩淚魯人迷通宵塵土飛山月是處經營夾御堤
頃刻知音幾存歿半回依約認輪蹄

洛陽陌

李白

白玉誰家郎回車渡天津看花東上陌

一作
墮上

驚動洛陽人

長安道

崔顥

長安甲第高入雲誰家居住霍將軍日晚朝回擁賓從

路傍拜揖

集作揖拜

何紛紛莫言炙手手可熱須臾火盡灰亦

滅莫言貧賤即可欺人生富貴自有時一朝天子賜顏
色世上悠悠應始知

同前

孟郊

胡風激秦樹賤子風中泣家家朱門開得見不可入長
安十二衢投樹鳥亦急高閣何人家笙簧正喧吸

同前

顧況

長安道人無衣馬無草何不歸來山中老

同前

聶夷中

此地無駐馬夜中猶走輪所以路旁草少於衣上塵

同前

韋應物

漢家宮殿含雲煙兩宮十里相連延晨霞出沒弄丹闕
春雨依微自甘泉春雨依微春尚早長安貴遊愛芳草
寶馬橫來下建章香車却轉避馳道貴遊誰最貴衛霍
世難比何能蒙主恩幸遇邊塵起歸來甲第拱皇居朱
門峨峨臨九衢中有流蘇合歡之寶帳一百二十鳳皇

羅列含明珠下有錦鋪翠被之粲爛博山吐香五雲散
麗人綺閣情飄飄頭上駕釵雙翠翹低鬟曳袖回春雪
聚黛一聲愁碧霄山珍海錯棄藩籬烹犢羔羔如折葵
既請列侯封部曲還將金印授廬兒歡榮若此何所苦
但苦白日西南馳

同前

白居易

花枝缺處青樓開豔歌一曲酒一杯美人勸我急行樂
自古朱顏不再來君不見外州客長安道一回來一回

老

同前 薛能

汲汲復營營東西連兩京關繻古若在山岳累應成各

自有身事不相知姓名交馳喧兼集作衆類分散入重城此

路集作去去無盡萬方人始集作旋生空餘片言苦來往覓劉楨

同前 僧貫休

憧憧合合八表一轍黃塵霧合車馬火熱名湯風雨利
輾霜雪千車萬馱半宿關月上有堯禹下有夔禹紫氣

銀輪兮常覆金闕仙掌捧日兮濁河澄澈愚將草木兮
有言與華封人兮不別

同前

沈佺期

秦地平如掌層城出集作入雲漢樓閣九衢春車馬千門旦

綠柳開復合紅塵聚還散日晚鬪雞回經過狹斜看

梅花落

盧照鄰

梅花落本笛中曲也按唐大角曲亦有梅花小梅花等曲

梅嶺花初發天山雪未開雪處疑花滿花邊似雪回因
風入舞袖雜粉向妝臺匈奴幾萬里春至不知來

同前

沈佺期

鐵騎幾時回金閨怨早梅雪中

一作寒

花已落風暖葉應開

夕逐新春管香迎小歲杯

集作盛

時何足貴書裏報輪臺

同前

劉方平

新歲芳梅樹繁苞

集作花

四面同春風吹漸落一夜幾枝空

小

集作少

婦今如此長城恨不窮莫將遼海雪來比後庭中

紫騮馬

盧照鄰

騮馬照金鞍轉戰入臯蘭塞門風稍急長城水正寒雪

暗鳴珂重山長噴玉難不辭橫絕漠流血幾時乾

同前

李白

紫駟行且嘶雙翻碧玉蹄臨流不肯渡似惜錦障泥白

雪關山

一作城

遠黃雲海樹

一作戍

迷揮鞭萬里去安得念

一作變

春

閨

同前

李益

爭場看鬪雞白鼻紫騮

一作騮

嘶漳水春歸晚叢臺日向低

歇鞍珠作汗試劒玉如泥為謝紅梁燕年年妾獨棲

同前 秦韜王

渥洼奇骨本難求，況是豪家重紫騮。
臙大宜懸銀壓鈐。

一作勝力渾欺却 集作著玉銜頭，生獰弄影風隨起。
集作步躩躩衝塵。

汗滿溝，若遇丈夫皆調御。
集作能控馭任從騎 一作驅取覓封侯。

驄馬

李羣玉曰驄馬驅

浮雲何權奇，絕足勢 一作世未知。
長嘶青 集作清海風躩躩振雲。

絲由來渥洼種，本是蒼龍兒。
穆滿不再活，無人崑閬騎。

君 集作若識躍嶠怯寧勞，耀金羈青芻與白水。
空笑駑駘肥。

伯樂儻一見應驚耳長垂當思入荒外逐日向瑤池

驄馬曲

紀唐夫

連錢出塞蹋沙蓬豈比當時御史驄逐北自諳深磧路

連嘶誰念靜邊功登山每與青雲合弄影應一作因知碧草

同今日虜平將換妾不如一作知羅袖舞春風

雨雪曲

李端

天山一丈雪雜雨夜霏霏溼馬胡歌亂經烽漢火微丁

零蘇武別疎勒范羌歸若著

集作看

關頭過

集作下

長榆葉定稀

同前

翁綬

邊聲四合殷河流
雨雪飛來徧隴頭
鐵嶺探人迷鳥道
陰山飛將溼貂裘
斜飄旌旆過戎帳
半雜風沙入戍樓
一自塞垣無李蔡
何人為解北門憂

劉生

盧照鄰

劉生氣不平
抱劍欲專征
報恩為豪俠
死難在橫行
羣羽裝劍鞘
黃金飾馬纓
但令一顧重
不吝百身輕

雍臺歌

溫庭筠

太子池南樓百尺八一作八窗新樹疎簾隔黃金鋪首畫鉤

陳羽葆亭童

集作停幢

拂交戟盤紆闌楯臨高臺帳殿臨流鸞

扇開早雁聲鳴細波起映花鹵簿龍飛回

捉搦歌

張祐

門上闕牆上棘窗中女子聲唧唧洛陽大道徒自直女
子心在婆舍側嗚嗚籠鳥觸四隅養男男娶婦養女女
嫁夫阿婆六十翁七十不知女子長日泣從他嫁去無
悵悵

幽州胡馬客歌

李白

幽州胡馬客綠眼虎皮冠笑拂兩隻箭萬人不可干彎
弓若轉月白雁落雲端雙雙掉鞭行遊獵向樓蘭出門
不顧後報國死何難天驕五單于狼戾好凶殘牛馬散
北海割鮮若虎餐雖居燕支山不道朔雪寒婦女馬上
笑顏如赭玉盤飜入集作飛射鳥獸花月醉雕鞍旄頭四光
芒爭戰若蠱攢白刀灑赤血流沙為之丹名將古誰是
疲兵良可歎何時天狼滅父子得閒安

一作安閒

白鼻騮 李白

銀鞍白鼻騮綠地障泥錦細雨春風花落時

一作春風細雨落花時

揮

鞭且

一作直

就胡姬飲


同前 張祜

為底胡姬酒長來白鼻騮摘蓮拋水上郎意在浮花

御定全唐詩卷十八

謹案卷十六第七頁後二行邊豆斯撤刊本邊訛
蓬據郭茂倩樂府改





總校官庶吉士 臣 張能照

校對官檢討 臣 龔大萬

謄錄監生 臣 杜 成

謄錄監生 臣 朱懷玉